

摘藻堂四庫全書薈要

集部

欽定四庫全書薈要

集部

誠齋集卷

五十五至  
六十

詳校官助教臣謝登雋



欽定四庫全書薈要卷一萬五千六百三十二

集部

誠齋集卷五十五

宋 楊萬里 撰

與前盱眙葛寺丞啓

題慈恩之雁塔初記同年過荆溪之鷁舟再分一日慨  
雲散之滋久喜霧披之此逢恭惟宮使判府寺丞氣益  
諸公名高當世尊主庇民之學素蘊胸中經天緯地之



文不專紙上蚤擢東堂之桂騰輝南斗之星從鳴弦治  
行之最高膺錫環嚴召而入覲簿正外府吏無遁情制  
除為丞國乃既富一麾出守千騎東方賢于七百里之  
長城自當十萬兵之堅寨暫此珍臺之少憩即看廣廈  
之論思某十載違離寸心鑒寐不意周年之遲暮得親  
盛德之高明其為驩欣未究宣寫

謝陳左藏啓

屬聞鈴齋小寓長卿之重客誰謂艸徑亦迂韓子之高

軒折屐齒以驩迎聽衝牙之清越恭惟判院有譽寡二  
收科疊雙潛心覃思研百聖之淵蘊下筆摘藻罔衆作  
之嚶鳴將總轡于石渠東觀之清蹕聊發軔于都內水  
衡之劇務某少而嗜學老矣息心照乘連城驚逢至寶  
之投贈擊轅拊缶第媿報章之疏蕪感激有懷鋪張何  
極

回韓撫州賀年啓

御溝新柳初回天上之春江路野梅忽寄隴頭之信感

故人之相慶與元日以俱來恭惟判府郎中人門雙高  
聲實並茂臨康樂山水之郡不妨清游哦少陵鶯花之  
詩即還近列某立朝無補視蔭又新撫歲月之如流慨  
林泉之未返

辭免贛州得祠進職謝宰執啓

閒館珍臺奉仙真于霞外道山延閣聯論譔于日邊曾  
是山澤之臞洽于雨露之渥伏念某景薄朽止分甘晏  
如幼學之壯而欲行之豈不願仕今老矣無能為也矣

加之卧病頃落黃茅之鄉屬嬰清漳之痼臂使指而衡  
決錐與穎而仇謀吹燈而作蠅頭故非所辦涉筆而署  
紙尾亦復作難虛辱千騎之東來敢把一麾而出守顓  
天自免下詔曲從羸牛輟耕聽林間之橫笛老馬倦路  
脫果下之鳴珂茲蓋伏遇某官亮天曰仁下士以禮播  
鈞德普遂萬物之攸宜納隍思深憂一夫之不獲若為  
老病尚賦餽牽某方息交絕游處陰休影濯清泉以自  
潔一洗滿裾之埃抱明月而長終未知報德之所

賀周丞相遷入府第啓

恭審五卜習吉三神前驅兩兩上能有嚴有翼潭潭新  
府是斷是遷茲謂天下之廣居曷云一國之鉅室岩壑  
迎六一之思潁水石繞衛公之平泉楚畹滋蘭淮山移  
桂雨簾雲棟不但春深將相之家樓影花光別有天入  
滄浪之瀨恭惟歡慶某凍吟瓮牖跂足宮牆室邇而人  
則遐空有渴心之勞止厦成而燕不賀自笑病身之孿  
如



賀太守冬啓

伏以雲低魯觀紀華袞一字之書日麗魏宮詠刺繡五  
紋之句瑟彼賓贊蔚乎府庭恭惟某官政隨日新身法  
天運名章俊語爭珠星璧月之光義氣仁風回冰谷雪  
山之暖聊復折梅于東閣即看鳴玉于紫宸某爭席漁  
樵遁身江海華裾織翠自憐賀客之莫隨凍硯流澌更  
媿慶賤之不琢

賀周監丞冬啓

伏以日華五色初行北陸之虛雲氣萬重特書南至之  
瑞仁者賢者神之聽之厥有善祥集于眉壽恭惟某官  
才調造乎白雪文律中于黃鐘所謂伊人粹然冰釋而  
理順在彼空谷淡乎霜清而水寒盍乘一爻陽復之辰  
遂邁三點鵲行之羽某羸然病骨老矣空山製江南落  
毛之衣聊以卒歲試囊中餐玉之法可以御冬趨賀未  
由占詞不敏

賀周丞相冬啓

伏以景至特書紀三台五雲之瑞客來作頌賡萬有千  
歲之章協氣橫流沍寒載燠恭惟某官補天道妙播物  
功崇徒枉成而橫野水之舟微霰零而縮霖雨之手巡  
簷索笑幽尋驛使而折梅登樓銷憂遠睇漁翁之釣雪  
長於上古而不老永與造物而為徒某拾橡樂飢采薪  
謝火逍遙賀厦仰瞻相府之潭居不腆壽觴奉上田家  
之老瓦其為頌詠罔既敷陳

謝周監丞啟

冬節餽海  
錯果實

伏以味鏡潭之漁蝦覺海雨江風之入齒飮冰盤之柿  
橘粲烏桺金彈之照人敢期四者之難并乃肯一時而  
分付恭惟某官軫交游之雲散感節物之日新舉白飛  
觴忽念山中之客絕甘分少送將席上之珍頓首拜嘉  
占詞抒謝

謝周丞相賀轉中大夫啓

伏以飛龍在天重開太極春雨潤木四達函生野不遺  
于外祠秩增視于內史我聞有命尚未敬授于贊書公

將祇驩相下先逮之慶語小遲九頓首之謝敢忘一援  
手之恩占詞不莊全度是望

回新知通州葛寺丞啓

布帆無恙尚記江頭楓葉之秋尺素相思忽得隴首梅  
花之信蓋清風朗月必思于玄度而高山流水久隔于  
昌黎側聞千騎之除不越兩淮之近如欲占公論之存  
否胡不眡善人之屈伸恭惟某官所學深造于道原餘  
事通達于國體語妙天下親傳前輩之典刑敵在目中

自任當世之勛業舊常在漢廷群臣之右者晚乃取唐  
家一障而乘之袖間之手幾年塞上之馬再至未容葺  
燾之建即有璽書之追某卧病荒寒懷人悄跂誰其見  
太白於禹穴願言問信於何如安得逢杜甫於飯山空  
想別來之太瘦抒謝不敏摛詞未殫

除煥章閣待制謝余丞相啓

祝釐報上陪游漢時之祠官第頌展詩復玷堯文之次  
對方朝廷求舊以示盛德之事何草茅下客乃為多士

之先仰惟七閤之穹崇減去列聖之制作惟我高后如  
彼陶唐以魏煥之文章式經緯於天地金聲玉振紹二  
典與三謨星翻漢回舉萬物而五色顧典領之已重况  
評論之至榮如某者老而益衰病以自免二節以走阻  
造大昕之朝三命滋恭躡陞法從之列使宅珍臺之拂  
日得參仙侶之御風據龜殼而食蛤蜊游汗漫九垓之  
上揭斗柄以幹海水嬉蓬萊方丈之間庸有為人而擇  
官乃令超世而絕俗此蓋伏遇大丞相學詣乾坤之蘊

忠爭日月之光以周公父師之尊弼於嗣聖謂商山羽  
翼之舊野有遺民徯太上之意先廣初元之孝理某敢  
不堅此歲晚荅於已知放鶴出籠尚竊壯哉崔鼠之餽  
縱魚入海遂獲沛乎風壑之歸過此以還未知所措

賀周丞相年啓

伏以嗣聖初年慶三朝之元會鴻鈞一氣轉萬國之春  
風恭惟上相顙面正朝之崇超然倫魁珍臺間館之表  
法天之運希聖之時隕祉發祥應期紹至水橫梅影舊



嘗和玉鉉之羹地出醴泉新釀作椒花之酒願奉上魯  
公萬有千歲之遐壽更永觀尚父二十四考之屢書嘉  
頌未央脩詞不腆

回周子中監丞賀年啓

伏以王者大一統肇新謹始之元君子法四時哀對履  
端之慶是叢壽富康寧之福畢集氣志清明之躬恭惟  
某官德行淵騫伯仲伊呂東風解凍吹成白雪之詞章  
春日載陽藹入紫芝之眉宇即覲天門之金榜徑昇卿

月於玉墀某幽屏山寒不知歲換冰花徹骨怯如難至  
之鶯柏葉稱觴慙於相賀之燕寸心孤往尺牘萬分

謝周丞相啓

屬入州府獲登相門初求仰潭府而觀光既乃下懸榻  
而設醴登樓假日縱觀晴吳曉楚之天說詩解頤朗詠  
老蜀歸秦之句雲間梁棟世界鶯花江山遠開應接不  
暇超然欲羞蓬萊而薄員嶠浩乎若決雲漢而略博桑  
觀瞻少雙榮感千萬謹抒謝臆仰惟鈞察



誠齋集卷五十五

欽定四庫全書薈要卷一萬五千六百三十三

集部

誠齋集卷五十六

宋 楊萬里 撰

啓

答周子中監丞賀除待制啓

伏以授靈圉於閒館已冒祠官之除森寶書於玉堂復  
塵次對之選方抗章而祈免致杼謝之少臯恭惟某官  
文行追乎前修名實冠乎昭代晉伯之與微仲仰玉山

兩峰之並寒東坡之及潁濱豈金支秀華之小異除進  
退塞通之外無優劣季孟之間既袖手以旁觀請懸車  
而不得清標絕俗高節邁倫元方之難為兄中表每慙  
於先用卓茂之拜太傅功名何必於早年某幼辱與游  
永矢同志忘形而到爾汝屢分燈燭之光握手而出肺  
肝靜看衣紉之變一出而試兩俱無逢豈其所操之畸  
皆非速售之韞雖枕流漱石終隨高蹈以相依然濁泥  
清塵曷曰下風之敢望偶誤膺於異數遽先辱於慶牋

燃霜開電折之光以華其老鐸玉佩瓊琚之韻大振厥  
詞先之以河東吹送之私申之以渭北論文之好心萬  
其感言多奚為

答撫州周通判啓

恭審端策辰良紆印組之方寸下車燕喜割風月以平  
分朝發六一其郊其里之鄉暮登半山若蟠若距之閣  
庭闈咫尺官府穹崇雖名兩地之暫殊其實一望而可  
接忠孝兼美家國俱榮恭惟判府直閣學傳省齋之衣

職屈士元之驥以三十年涵養之充實久遁其光與二千石協同於寅恭姑小其試獨不見虹蜺紫翠之暈其下乃珠玉潛伏之暉有至珍而未沽無深閤之能揜過庭詩禮瞻夫子之在前錫山土田竚魯公之拜後某自笑老病其誰嘉矜擁高蓋以及門續其觀者焚枯魚而酌醴豈曰禮云忸燕賀之未申駭鯉封之先甲靖言多謝不盡有說

回周丞相賀進爵開國子轉大中大夫啓



伏以進周家列爵之封其班視子增賈傳超遷之秩有  
命在塗顧同時冒寵之疊雙甫邇日拜嘉之先一有待  
而謝乃失之臯此蓋伏遇致政少傅大觀文左丞相國

公洪化噓枯上仁播物柳舒梅放皆在春風吹萬之中  
川泳雲飛孰出元氣函三之外某身其餘幾望已無它  
久爭席於漁村尚挂名於官簿連城明月首勤相慶之  
瓌詞墜露落英頓喜再回於生意惓惓有感嘯嘯無央  
仰惟鈞慈俯賜燭照

答周丞相送糟蟹朽木團啓

恭承妙摘走送幽餉疊雙戾止則百拜斯郭索束裝更  
挾帶糟之味餵鯨彫朽新翻寒具之油豈加籩之敢嘗  
敬造禰而先薦同我婦子分此絕甘俾公壽臧餘無以  
報

再答周丞相賀除待制啓

帝有恩言陞之次對臣無虛受方且控詞適寸心恍駭  
之不遑致尺牘催謝之小緩首蒙相國軫記腐儒先之

以瓊琚玉佩之偉詞申之以鈇畫銀鈎之妙墨非烟非  
霧豈不榮色正而芒寒如絲如綸尚未獲下拜而登受  
姑徐有頃別繫謝牋不容騎吏之空歸先為感悰而張  
本

荅吉守啓

比蒙聖恩擢真次對自顧弗稱再茲固辭致小緩於謝  
牋乃先勤於慶牘發緘朗咏摘詞有瑤玉佩瓊琚恍從  
霄漢而下墮破甑敝帚忽覺名賈之頓高俟登受於絲

綸額敬修於札翰姑謝誨劄非曰報章仰惟台慈俯垂  
亮察

賀周丞相年啓

伏以二年正月挈天地以趨新泰階六符開日星之明  
朗倬彼造化爲工之處郁乎雲煙非霧之祥恭惟某官  
一氣轉乎鴻鈞二儀爲之交泰揭載陽之日以照平泉  
之水石歛解凍之風以熙曲阜之山川侵雪色漏春光  
玩萱草柳條之變餐朝霞飲沆瀣迫方瞳綵髮之仙某

青笠遺心白饒託命聯句洛社願聞中立拉花之詞守  
歲咸家敬獻子美頌椒之祝

賀周子中監丞年啓

伏以三日立春方過寒氣土牛之送二年正月又見盍  
簪擁馬之喧有美一人來同萬福恭惟某官人物標的  
文章主盟剪水鏤冰凋天葩而覲巧御風騎氣與造物  
以同游哀對履端之告元乘成泰吉而暈進雲隨白水  
聊小詠於鶯花日射黃金即高吟於烟草某老兼疾至

坐感時遷江路望梅敬寄一枝之信椒盤柏酒阻稱千  
歲之觴

答周子中啓

屬聞二難胥集方尋對床聽雨之盟一乘載奔願造會  
弁如星之列望行塵而未至悵人事之好乖衝泥而歸  
弛擔甚憊忽傳魚雁之良訊共歎燕鴻之失期詞旨丁  
寧意氣淒斷其為感激罔既敷宣

賀太守年啓

伏以送寒氣以土牛春方迎於帝皞喧盍簪之樾馬歲  
又慶於王正有臧邦君之賢允洽國人之頌恭惟某官  
奉詔寬大頒條中和春日載陽散作萬家之協氣東風  
解凍潛消千里之歎聲哀對履端之告元即觀泰吉之  
彙進某違離半月瞻仰二天江路埜梅敬寄一枝之信  
椒盤栢酒阻稱千歲之觴

荅廣東唐憲啓

恭審崇朝而易三節游疏東闕之恩出使而占二星不

離南斗之次光茫所被中外載瞻恭惟某官以清節兩  
唐之子孫有高名千古之風烈秀林間之桂拂蒼玉之  
嵒峨折嶺上之毒漱碧海之芳潤爰自珠宮之市就領  
冰坻之蹇曾不踰時復移司憲欲知聖主急賢之意於  
屢遷而小觀從此春風玉笋之班即一起而直入某新  
摩病眼快睹除書曾燕賀之未遑忽鯉封之先墜媿喜  
兼集攄寫奚窮

荅廬陵黃宰啓



伏以乘槎犯斗泊秋日之樓臺拄杖穿花步寒溪之金  
碧窮十里九山之險抵千岩萬壑之幽未童子之鷹門  
已羽人之響屐恭惟某官鐔城寶氣脩水聞孫句法親  
傳出月脇天心之上淵珍孤映分珠胎水府之中尋盟  
快閣之江山償債釣臺之笋蕨弦歌旁縣衣鉢祖風能  
窮人亦能達人誰謂詩家之寒瘦有小雅故有大雅即  
扶清廟之隆平某移病休休遁身得得泉育霞痼非鵲  
能砭花徑蓬門惟鷗之處怪咄咄山林之寂驚憧憧車

馬之喧與俗酸醎自有癖羊棗昌歆之嗜同古臭味更  
投贈瓊琚玉佩之詞有萬其悰未一其述

荅江西提刑俞大卿啓

屬者夜占天文德星臨於翼軫晨望雲物紫氣至於函  
關驚喜廣廈萬間之新已是受賜一民之數念欲遮見  
即圖駿奔老病所纏願言莫遂乃令兒輩亟代躬行茲  
謂敬乎良可慙矣不謂交代提刑尊丈折節繡斧之威  
重篤契布衣之素交雲錦封書恍從天落玄纁厚幣莊

以禮將野人者世之所同輕惟公獨否古事者今之所  
不作非賢孰能九頓首以拜嘉一出言而何謝復許誦  
甚都之騎將下臨常關之門開蓬掃花當出迎千里之  
命駕折荷薦芰庶小款一尊之論文

賀周丞相戊午年冬啓

伏以日在牽牛應周官之測景月居繫馬申呂令以驚  
農仰占東垣上相之躔正集南極老人之次恭惟致政  
少傅大觀文左丞相國公鈞陶萬類寅亮兩儀迎一丈

三尺之暉載臨履永上萬有千歲之頌以慶踐長某齧  
雪絕甘鏤冰自苦惡風動地誰憐獨冷之餘愛日行天  
聿在負暄之下謂之善禱未易立談伏惟鈞慈賜之下  
燭

賀余丞相得祠祿啓

恭審謁告五旬屹然堅卧而不動遣使十反詔以留行  
而莫回奔騰東華之紅塵追送函關之紫氣觀者嘆息  
光於古今恭惟某官謨合臯陶之嘉身任伊尹之重故

邦家之杞梓拯之以一手而天下之危疑決之以片言  
昇啟明掃朝霞寅賓出日降元精扶太極昭格於天方  
當命珪相印賞功之秋乃賦清風明月閒人之句車幾  
兩馬幾駟豈惟帝賜疏傳之金蕃四國宣四方更醉王  
錢申伯之酒分十連之重寄冠三殿之大稱意請真祠  
歸榮鄉社凜全名高節之獨著覓前侯故相之未曾鷗  
鷺候門爭前飛而相導鴈鸞回首仰遐舉之孤騫某辱  
知彌深聞問欲舞千里命駕當尋山行水宿之盟一尊

論文已作金春玉應之夢喜而不寐情見乎詞

誠齋集卷五十六

欽定四庫全書薈要卷一萬五千六百三十四

集部

誠齋集卷五十七

宋 楊萬里 撰

啓

己未賀周益公年啓

五年王春先問建杓於北斗正月吉日頓回入律之東  
風自非少傅寅亮之功那得太平有象之慶恭惟某官  
身為造化手挈陬維轉一氣之鴻鈞昔嘗入甄陶之下

調四時之玉燭今猶蒙土苴之餘即拜周公而為師更  
與廣成而同歲某牛衣僵卧鶯喚不醒忽報頌椒之辰  
忙寄折梅之信西江萬頃釀作聖人之清南極一星祝  
為仁者之壽

荅周監丞己未年啓

伏以書函交馳誰無施而不報使者係道亦何往而不  
來初謂先人有奪人之心今乃求繫而得繫之戚恭惟  
某官揮毫珠玉落紙雲烟倚馬萬言視桑蔭而未徙解



牛十二拂乃及以如新敢當孫子正正之旗遂應號公  
煇煇之策此既豎降幡而棄甲公其振旅凱以還師推  
次不莊仰惟昭察

回周丞相賀年送羊麪啓

伏以玉衡之正泰階密運發春於隴首銀鈎之明璽紙  
有來守歲之咸家舉林鴉櫪馬以皆驚顧官柳埜梅而  
亦喜恭惟某官以整頓乾坤之手而對盛德之大以開  
闔日星之機而哦猷頌之椒吐詞為經妙者三天而兩

地染雲作葉忽然萬草而千花既下詒謂一之瓌文復  
飲賜疊雙之節物霏霏落雪如聞天旋雷動之聲濺濺  
飲池想見風吹草偃之狀自嗤一室之懸罄那得二美  
之所鍾已飽而歌益習其讀瞠若奔逸恍失一交臂之  
間待其春容惟有九頓首而坐推謝不恪誦言未央

荅周監丞送錦鳩十四隻兔羝酒香櫟啓

伏以錦羽在桑翩翩二七褐衣缺口躍躍一雙挾驩伯  
以俱來併木奴而畢集恭惟某官邦家麴蘖儒學鳳麟

游梁王之兔園夙推能賦賜漢廷之鳩杖晚冠耆英橘  
頌續騷酒箴飽德填然四美醉此一翁某已嘗占詞敬  
致追節忽拜辱於珍餉敢復抒於謝誠

賀趙守冬啓

兒童騎竹初迎五馬之臨律呂吹葭忽報一陽之復誰  
謂大冬之在序頓回小至以如春惠化川行善祥山則  
恭惟某官德同愛日文妙書雲瑞烟祥風轉天地嚴凝  
之氣雪山冰壑照旌旗錦繡之香斂時十萬戶之懽聲

散作一千里之暖翠恐即飛於鳳詔遂趣入於鷄行某  
忽忽望塵咄咄還舍倚南溪之弱柳方狎漁樵之游仰  
東閣之官梅莫陪賓贊之賀善頌無數多言未殫

答趙守啓

屬勤折簡招致初筵捧移檄以載聿茲謂州民之敬侍  
盛饌而變色更為楚老之榮退省清羸久嬰沉痾為心  
病為耳痛殆百疾以交攻不飲酒不如葷每十物而九  
忌惜漚危惴敢辭縟儀自知方命之辜必抵大呵之譴

乃重煩於廚傳特飫賜於珍芳下乳酒於青雲出瑤盤  
之白玉紫衣職緋衣走紛吏卒之鼎來朝食饗夕食殮  
奏餼牽而畢集加籩既秩折俎屢豐靖言餘生尚竊厚  
祿歲糜廩粟已耗蠹於邦儲肉繼庖人復貪饗於臺餽  
其為媿感莫究敷陳

荅周丞相遠迎啓

衝雨入郭仰謝洪鈞之塊北登車載路忽傳真帖之光  
華辱問訊其良苦於泥中則俯伏而下拜於道左方將

迎應接之罔暇覺進退周旋之弗能盈耳輝如之玉鉞  
橫空詭然而鳳躍恩勤至厚感愧來并善用兵者出奇  
無窮驚逢突騎不待期而薄人於險願監降幡

賀趙守丁巳年啓

使君千騎方瞻高牙大纛之新春王三朝復慶列炬盍  
簪之盛恭惟判府提舉大中須條朝徹出令春生汎東  
風解凍之崇光揭遲日載陽之清淑綠攪原野青歸桑  
麻問斗杓於天邊暫帶江城之月詠龍池於花外即聞

長樂之鐘某已矣年衰居然歲換椒盤柏酒阻稱千歲  
之觴埜柳官梅敬寄一枝之信

謝周丞相冬節送羊麪啓

嚼氷飲水久甘木客之山殮落雪卧沙走送玳筵之綺  
饌夫何天上之相國猶念山中之病身餽節疊雙拜嘉  
則百恭惟某官有粉米舜裳之妙巧有鹽梅商鼎之丕  
功以德飽人豈空為畫地之餅作羹食士未嘗偏前日  
之羊嗟腐儒之覓腸駭厨珍之飫賜既將之以鉄畫銀

鈎之牘復華之以瓊琚玉珮之詞炙硯燃薪聊寫苦吟  
而推謝冷窓凍壁頓回春意之暄妍懷感孔多頌言無  
數

入城回周丞相遠迎啓

市有虎以殺人久不夢碧瓦朱甍之城郭門登龍而為  
御願再瞻青天白日之清明方夙興炊桂以風餐已首  
勤行李之郊勞霞發簡牘之字天落雲錦之書三過讀  
以清鐸九頓首而距躍頭白眼暗安得拜北平王於馬



前意豁神傾即當候龐德公之林下卒卒推謝拳拳未  
宣

謝周丞相年節送一麋十鬼啓

適遣山童疾馳賀幅忽逢騎吏交賜誨函既以一鏃逆  
相直之鋒自笑五更起侵早之曉瓊琚戛擊金薤紛披  
先之以柳條花塢之春申之以白獸綵旗之寵埜人拜  
此何福如焉獵雪後之銀麋更哦庾信之句失月中之  
玉兔不羨聖俞之詩二珍疊雙十輩登一推謝薄遽蔬

無不勝

荅贑州黃侍郎年啓

伏以日麗崆峒揭載陽之五色春生隴首啓肇始之三  
朝仰賢帥於德鄰函神人之祉福恭惟某官邦家司直  
岳牧詞人問斗杓於天邊暫帶江城之月詠龍池於花  
外即聞長樂之鐘遂轉鴻鈞永調玉燭某年衰甚矣歲  
換惘然方僵卧以沉綿乃洊勤於勞苦願微生高之可  
笑安敢乞醯惟嚴鄭公之垂憐時蒙送酒其為感載罔

究敷陳

寒食享祀謝王才臣送北果啓

伏以熟食按節春祠享先野蔌山肴方酌言於老瓦胡  
桃松實忽盈止於加籩繫宗祊之有靈微祉福以冥報  
豈惟無似之孫子分寶有朋之令芳抒謝不莊撫心靡  
已

荅周丞相啓

丞相之子彥敷來訪予草具一飯彥敷入京與

予二子往還丞相以啓見謝併報予長子改秩  
小男就銓

茅簷覆地敢枉東閣郎君之車旌旗拂天肯臨北山愚  
公之舍自笑春韭黃粱之寒陋安得青芻白飯之滋豐  
瞻巍冠之切雲矜崇論之振玉懽然促席舉侶過庭誦  
頓挫清壯之箴紬嚴恕敬謙之旨坐使回聞而知十底  
須亢問而得三不圖談笑相親之間盡窺宗廟百官之  
蘊欲推謝而未克忽誨言之有來顧惟荷篠二子之賤

微曾何足算乃至長安共客之落莫其罔不矜諗以得  
覲之日辰與夫考藝之姓字河陽桃李茲可忘一紙之  
春風使部銓衡恐難遁諸公之刀尺仰感烹魚之素俯  
寬舐犢之私奏記不莊撫心靡已

荅周丞相賀長男改秩幼子中銓啓

長男難矣初臨壯縣之萬家幼子斐然偶試吏部而一  
得民之多倖揆厥所元繫我公頭章破白之恩及平日  
口講拾青之誨率俾先人之門戶未荒數畝之蓬蒿蔚

之中心感焉至骨續其慶語之游至嗟若謝詞之數窮  
名位卑微誤辱二雛之賀衣冠盛事敢當一字之褒泚  
筆有齋素風孤往

誠齋集卷五十七

欽定四庫全書薈要卷一萬五千六百三十五

集部

誠齋集卷五十八

宋 楊萬里 撰

啓

答新太和張縣丞啓

三世與游豈曰薄乎云爾一書未至久已聞而知之竊  
惟英妙之年載飛俊茂之望水循除而瀟瀟小助藍田  
之哦鳳高逝以縹縹即還阿閣之遽某老披獨速病挈

苓箬舉厚祿之故人茫無一字微白雲之高誼焉得八  
行報雖不莊情則靡已

賀趙守加恩食邑啓

恭審膺受贊書光啓封國分茅昨土允為儒學之榮增  
秩賜金即表公卿之選恭惟驩慶某卧痾山墅阻造府  
廷不勝狗馬之誠敬馳燕雀之賀

答周丞相再賀生孫啓

伏以章孫載毓卿袞踰褒方馳摧謝之緘重拜屢書之



帖擬上天歸平地之將相偶同物而類生近當

去聲

日是

中元之公台云着鞭之先我曾謂穉駢僭希勛賢仰止  
兵萊崇崛之功敬惟刀益峻極之德俱絕出於百世乃  
併期於一嬰若彼借寇恂於明年已恨雌而恨薄矧此  
與周公而並處敢亦步而亦趨雖心知其不然感意愛  
之非淺欣悰何數對臆未央

謝周丞相冬節送十鳩四兔啓

伏以鳴鳩在梅方與七雛而啄雪狡兔入草深藏三窟

以卧霜夫何相府之虞衡小試平園之鷹犬併掩羽毛  
之美以給刀匕之鮮分似謏聞飫以大嚼錦翼倍五漿  
之餽褐衣餘四矢之癥喙三尺以流涎食方丈而在眼  
不狩不獵第厚媿伐檀之詩非熊非羆恐再歸釣渭之  
叟

荅周監丞賀啓

時益公冬  
啓同至

昨遣長鬚致短札以脩亞歲之賀仰祝大年之祥介  
者未還使乎踵至方與南北阮之族小語竹林忽報東

西周之師併攻楊邑雲合霧集車馳卒奔焉敢仰闕而  
攻分甘曳兵而走尚蒙四酒以飲子反先以乘韋而犒  
孟明既效卻至之趨風即出檀公之上策左支伯兮偉  
節之怒右梧仲氏丞相之嗔紛紜之間應接不暇推謝  
不恪多言未窮

荅撫州周通判冬啓

伏以微陽萌動小至晴寒恭惟某官捧二尺之木書尋  
一丈之線日歸省天上之二老敬浮長至之重觴州里

榮光荐紳歆艷歌萬有千歲之頌祝眉壽於一家賦五  
更三點之詩看鵷行之首入其為善禱未易縷陳

賀周丞相自長沙移帥豫章啓

膺天贊書謀帥卿部孤忠貫日已開南岳之雲餘事作  
詩却卷西山之雨上釋宵衣之憂顧下觀畫錦之榮光  
即命唐叔而歸於東復立傳說而置諸左侯入而賀今  
未足云某老以病身寄於知己脩方伯連帥之職舍我  
誰哉忘平生久要之言非予望者拳拳之悃尚面以陳

謝周丞相餽歲三物鳩獐驢肉啓

蕪詞引玉已萬其榮綺饌席珍復三有賜披鱗公之尺  
素得鳩婦之五紋驅馬獵麋細哦庾信之句取驢逐虎  
更味退之之言敢不拜嘉知何以謝翼翼之悃詹詹莫  
窮

荅周丞相謝看樓啓

昨巾私車擁篲公府豈惟拭目縱觀元龍百尺之新端  
欲折腰雅拜方朔六符之擢誰謂山林之老叟得參袞

繡之後塵筭與金梯我公忽在於天半黃冠縵服賤子  
瞠若於雲間笑語一聲江山千里食前方丈知主人何  
愛於絕甘尊底十分願病骨不堪於作苦此外泛應亦  
復孔難知我者以為嵇康命駕之相過傍觀者或謂樂  
克圖舖之有在僕所有寸心難處之事誰為言之公乃  
以尺紙隄度之辭不可加矣感焉翼翼謝則匆匆

荅賀吉水王縣丞啓

恭審書傳雙鵲文視四羊巨竹對松朗咏循除之水崇

桃積李平分壯縣之春播播仁風欣欣民氣恭惟某官  
膠庠先進湖海勝流蚤馳雋聲孰不誦秋水落霞之句  
晚成大器尚未施瑤林瓊樹之材初吟漂水之星心今  
署藍田之紙尾以儒術而飾吏事益老成而有典刑造  
茲休明行矣騫翥某眠雲岩石釣雪寒江三徑就荒誰  
其顧者四騏沃若公乃過之更詒瓊琚玉珮之詞足為  
山鹿埜麋之寵推謝不恪榮感尤深

謝周丞相賀年送羊麪并麀啓

伏以花燃錦帳占玉蟲金粟之何祥冰照雪山映栢酒  
椒觴而呈瑞忽騎吏瓊瑤之跡臨楚人雲月之家天落  
上台之書風清垂露之字龍蛇動篋悄然霧結而烟霏  
珠壁連文瞬若霜開而電拆長哦言語足制隕齡加饋  
歲之蕪三賞迎春而無兩烝花壓玉笑渠沈氏之飲朝  
煮餅澆葱試作廣微之薄夜更珍餉銀麋之美覺揮毫  
玉兔之窮推謝不莊仰惟鈞察

謝衡州陸守回書并送書籍黃雀北果啓



伏以門掩候蟲那得可羅之雀月明烏鵲忽報所留之  
魚烹之得書恍若見面恭惟某官人今而學之古德清  
而政之和瓊芳玉暉蔚機雲秀傑之氣淵秀霆啓凜遜  
抗英雄之風乃作意於陳人至垂憐而鄭重靡叩弗應  
如鼓荅枹瞻祝融紫蓋之峯率乎峻極顧埜服黃冠之  
狀耄矣摧頽莫勝舐犢之私偕申巢燕之托不寧墮翰  
墨文章之絕妙端復拜策書看核之滋豐東觀西崑怪  
底牙籤之未見南烹北果快哉犀筋之新嘗願推老老

之仁眡為子子之惠大德不報雖負衛平之言中心何  
忘敬賦周人之雅

回太和卓宰庚申年賀年送酒啓

正月戊子日

伏以歲在申而先庚符藝祖興王之運日惟戊而配子  
應吾皇誕聖之辰惟賢履端與國咸慶恭惟某官以閩  
訓孝秀之冠續山谷弦歌之聲春閣風烟興寄鄰封之  
桃李釣臺笋蕨夢回古寺之林塘後先百年標韻一致  
勿歎江西之飲水即看花底之退朝某釣雪孤舟眠雲

岩石聽澗松之清吹方峨茗椀之勛下乳酒於青雲忽  
拜山瓶之味感慄靡已報謝不莊

回萬安趙宰賀年送金橘山藥煑菜啓

伏以王春六年又臨獻歲正月元日值慶履端初驚市  
橋柳色之新忽報隴首梅花之信恭惟某官頌椒絕唱  
夢草偉詞遲日暖風放河陽之桃李黃鸝紫燕和武城  
之絃歌即升度於玉墀遂頡頏於霞佩某嚼冰萬壑披  
雪一簑自束白茅歸煮黃獨誰謂紅塵之騎飛墮紫山

之章鑄金梓之石凡更詒嘉橘熬瓊糜於山蘋佐以珍  
蔬芬然焯頭之芳辛醒此覓腸之清苦感懷無數占謝  
未央

四周丞相送一麋四兔啓

庚申臘

鼻息晝眠方齁齁而成曲足音午夢驚啄啄以叩門雙  
玉寸金忽披妙札一麋乘兔加勞珍烹味起逢澤之介  
麋羣掩中山之明眎荐新屏攝分餽室家為公酌竹葉  
以先嘗慰存窮鬼恐僕夢蔬畦而見怪駭愕藏神推謝

不莊獻笑斯在

誠齋集卷五十八

欽定四庫全書舊要卷一萬五千六百三十六

集部

誠齋集卷五十九

宋 楊萬里 撰

啟

謝臨江軍葉守送酒啟

伏蒙台慈特屈二千石之達尊分似三十輩之驩伯百  
末玉色一卮重錫首醵屏攝以荐新次與室家而受餽  
徑醉公瑾醇德之惠媿無少陵濃香之詩推謝不莊感

金  
卷五十九  
歲何極

回吉州趙司戶得憲臺舉縣令啓

伏以戶掾屈杜有光綠水之芙蓉憲臺存衡先種花封  
之桃李惟中之充者其表自燃顧價之重而所仇尚輕  
僕何力之有焉入而賀則後矣更往而教以媿其心不  
勝主臣夫復何道

回廬陵黃宰謝得審察指揮啓

恭審茂宰報政諸臺薦賢膺天家特除之恩錫公府察



廉之命恭惟懽慶某蒙賴沃若聞音躍如繫崔賀之小  
臯已鯉封之下墮咎在不敏言之起羞

荅周丞相謝訪及啓

昨入州府獲登相門仰瞻泰階之六符曲承留款亟返  
衡宇之三徑政坐病衰小臯推謝之函已拜勞還之牘  
震震以懼詹詹未詳

回贛守新除廣帥彭子山郎中賀年送酒啓  
貧居卧雪安知梅柳之春軍將打門踏作瓊瑤之跡乃

諫議茶書之問訊致拾遺栢酒之慇懃恭惟某官節瑩  
飲冰詞清剪水崆峒麗日方布畊桑隴畝之和觀閣連  
天又新戟纛戈堦之盛印頒銀紐信度玉墀某似范一  
寒如鄭獨冷故人別我尚蒙分乳酒於青雲閒宦病身  
自此寄誰家之大廈

謝韓提舉賀正送碧香酒并鵝觥啟

元日至人日初回佳麗於雲中長懷復短懷政仰光華  
於天半忽辱隴首梅花之信更分蒲城竹葉之春恭惟

某官志在澄清威行刺舉傳吏部之學自六藝下逮於  
百家紹荊州之名願一識乃榮於萬戶茂對東風解凍  
之序峻陞西清寓直之班遙應使星槎上光浮於銀漢  
矚瞻卿月春前徑度於玉墀某行李白鑱生涯青笠方  
與狙公而拾橡驚聞軍將之打門對酒而愛新鷺一之  
謂甚得玉而求寶劍二者得兼便覺冷窓凍壁之溫頓  
解啼飢號寒之色感歲何數推謝未央

荅聶倅送淡風月軒記一軸啓

伏以層軒偉然一新風月之壯觀蕪詞陋矣不啻巴渝  
之里音既浣翠珉之鏡鐫復點華綺之藻藉賜以墨本  
覽之赧顏推謝不莊誦言靡已

荅胡季亨啓

詞奉談間居諸易久妙帖下逮長牋偕來明月連城驟  
驚滿把落英墜露頓覺回春某三章乞骸四載俟命蒙  
恩從欲謝事歸田願推謝之未能忽慶語之先辱

荅吉水秦宰啓

伏以錦纜牙樯沂濤江而夜上桃蹊李徑覺花縣之春  
生仁聲四馳邦域咸喜恭惟某官秦淮山川之秀紹興  
師相之孫翠竹碧梧載瞻鸞鵠之傍峙紫樞黃閣尚有  
老成之典刑小屈子男之封即慶公侯之復某老矣冉  
冉歸歟休休方幸病身仰託萬間之庇敢圖謙德先詒  
一字之褒推謝不莊誦言無已

答宿松知縣戴右伯賀致仕啓

追數同寮於金陵相懼不少其為投分之石友今復幾

何怒飛者莫顧於榆枌漂零者恍如於霜葉豈謂右伯  
知縣朝議寮友才名統世高誼薄雲志乎古違乎今不  
鬻於市炎而附寒而棄無貳爾心尚憐長缺之歸未忍  
短檠之棄方親朋舉無於一字莫往莫來乃星月獨垂  
於兩章以引以翼非特暄涼之間加遺藥物之珍望清  
淮之幾山空隨落照慨長江之萬里不隔相思翬翬有  
懷詹詹不盡

謝新雷州劉教授啓

太學賢士新折東堂之桂枝廣文先生肯顧南溪之鷗  
鷺掃苔錢而三肅瀾茗椀而一談恭惟某官學易詣於  
畫前出語妙於天下短檠勲績屢先鳴館下之諸儒長  
劍光芒誰能掄斗間之寶氣果摘髭於慈塏遂奪席於  
泮宮曾謂陳人乃迎舉趾詒我佩玖出衒袖之文書報  
之木瓜媿揮毫之蕪拙髦髦以感詹詹未殫

賀周丞相年啟

伏以六年王春正月元日乃占三陽道長之由為賦千

歲眉壽之咏舉五福以川增集一相之山立恭惟歡慶  
某屏居林壑遠蹟火城莫陪華裾織翠之賓奉上椒盤  
頌花之壽敬琢儷語寫諸楮生之前亦有村醪旅於庭  
實之末

賀黃經畧啓

恭審碧幢拂日紫氣過家有長沙益國之歸久不瞻元  
帥之禮樂緊建炎丞相之後今復見大將之鼓旗小憩  
午橋之莊即前乙夜之對屬茲痿老未拜羽儀敬揭小



夫之竿仰徹連教之謁

荅周丞相啟

恭承玉字送以憲書惟小子得為入幕之賓皆我公賜以荐禰之墨拔之汙瀆濯以清波免爭壟斷之錐刀得託外臺之覆露何以報德藏之中心

荅本路張提舉啟

一別瑤林瓊樹之姿十年夢耳再觀秋月華星之字三讀恍然仰惟南宮之望郎自是東序之秘寶蚤馳大手

筆之譽載揚飛霞佩之程柱笏設囊盍踵曲江之步武  
乘槎犯斗小迂博望之光華誰謂二天之崇未忘一日  
之雅錦書彪列繡口劬愉茅棟槿籬覺春風之入戶荷  
衣芟製驚華袞之繞身稱謝未詳伏惟原省

誠齋集卷五十九

欽定四庫全書薈要卷一萬五千六百三十七

集部

誠齋集卷六十

宋 楊萬里 撰

啟

與本路運使權大卿啟

恭審膺受璽書肅將水漕錦江玉壘回岷峨曉日之旗  
雲棟雨簾煥桑梓晝衣之繡過家適止即拜榮如恭惟  
某官嗣中興佐命之英為昭代典刑之老郎星卿月徧

春風玉笋之班便傳仙槎犯北斗銀河之浪乃底可蹟  
式遄其歸即陪紫禁之鶯花密綴彤庭之筆橐某十年  
不見千里相思獨有二天晚託故人之覆幬憑將尺素  
小攄慶語之殷勤

賀周丞相致仕啓

恭審三請告老九重莫回雖周傳益崇亮天地於孤保  
之右然陶仙徑去挂衣冠於神武之前恭惟某官太極  
之學先乎兩儀王佐之才周乎萬物致君而上堯舜是

殆見善者之德機有道而出義皇表獨立超然之燕處  
人猶望其再相已乃決於一歸八千為春觀壽福之未  
艾七十致仕舉禮經而力行眇近世諸公之絕無凜天  
下烈士之却立或謂平章軍國之重時未釋於潞公孰  
知富貴名節之全天併還於郭令某幼侍場屋老贊鈞  
樞翫海上之鷗已辱俯同於保社眷籠中之鶴自憐未  
脫於羈羈稱慶不勝摘詞何述

荅雷運使啓

伏以候紫氣於東關仰紛郁烟雲之表揭文星於南斗  
俯照臨翼軫之虛未伸燕賀之惟寅拜辱鯉封之先甲  
恭惟都運煥章吏部一世儒先之冠四朝俊彥之宗英  
識絕人不待三十里辨外孫之字名傳章後咸曰二百  
年無吏部之文方達路以持衡旋計臺而督餉鸞旂葺  
燾分閭宣威玉節仙槎乘輅問俗轍環久矣駟名宜之  
屬登攬於日畿示遄歸於天闕浮家泛宅駕言靈岩香  
徑之遊返旆南轅又賦秋水落霞之句小淹期月之頃

即綴三能之躔某獨速在躬笈箬在手誰謂繡衣之侍  
者肯顧黃冠之埜夫光施裁金截玉之聯以為漱石枕  
流之寵浩歌綠水恐詒聽者之清愁時寄白雲式表山  
中之遠信

荅廬陵趙宰啓

伏以命代風騷久誦長笛倚樓之佳句拂天旌旆驟臨  
東嶺煮芋之山人惟曉猿夜鶴之先鳴報問柳尋花之  
將至瑯衝牙之入戶折屐齒以出迎恭惟某官以翩翩

公子之佳乃戛戛陳言之去宰百里之土蔚為今日之  
德麟集三古以來再見西京之子政啟夕秀於未振吐  
天葩之奇芬惜古道無人而獨行技將安售炯潔井不  
食而莫惻聖者所艱顧不屑千室之邑而割雞真辱此  
六鈞之弓於射鼠公肯以儒而飾吏民知學道之愛人  
載路風謠以入魯山于荔于之曲第頌臺閣即賡卿雲  
旦復旦之歌某行李一蓑生涯半菽脛寒山雪慨黃獨  
之無苗舟載月明盟白鷗而為友曾未脩玉川參韓尹



之敬何以蒙洛令訪表安之謙掃花徑而開蓬門惜未  
容於小款用木李而報瓊玖慙不稱於所蒙悃悞無央  
誦言罔既

荅江南提舉張郎中賀年啓

伏以御溝新柳催省郎花底之朝東閣官梅寄驛使隴  
頭之信怪底玉蟲之報喜鼎來金薤之有華恭惟某官  
粹德春遲清名雪瑩池塘入夢挾綠波碧草之詞原隰  
觀風賡紫燕黃鸝之句立繡衣於霄漢倚玉節於雲霞

盍乘太陽哀對晉晝登車攬轡回漢家八使之輪上馬  
設囊傳唐相九齡之笏某柴立槁項木如空山短褐風  
霜自笑一寒之如此長瓶塵土懶吟五斗之自然敢期  
天上之故人尚憶門間之半面分正字之水衲頓回冰  
氏之溫拜司業之酒錢更覺窮鬼之富銜戢不淺揆叙  
未央

與新吉守劉伯協啓

恭審涓選岳牧保釐藩維偉然南一狄之英大名垂

於宇宙倬彼江右三劉之裔茂闕冠乎雲霄不待見而  
識耿介拔俗之標望其來而起中和樂職之頌恭惟判  
府大中經天緯地之學挈國濟民之謨泝子政子駿之  
淵源海同川會續公是公非之光艷電拆霜開播柳山  
之最聲為湘江之表選繫我枌榆之社為今鄒魯之邦  
鵠袍萬人來游泮水台星三點下燭平泉疇咨可績之  
賢宅乃承流之帥良二千石後稱西京循吏之遺風連  
一萬艘前作東坡送行之佳句小漱白鷺青原之芳潤

佇登紫荷玉笋之班聯某久挂雙綫將撰二屨扶杖聽  
詔即望見於慈珩當戶抱兒敢忘規乎薤黍跂跂廷迓  
喋喋未央

荅新吉水王宰啓

恭審再錫之邑有銅其章文江為文字之祥誰其盟主  
王姓乃王者之後今為仁侯恭惟某官世擅驚經詞傳  
雞檄斫桂月脇名高吳士之關種花河陽身為廉吏之  
表民亦勞止公其念哉聞將解瑟以更絃豈有張弓而

不弛若石壕無捉人之吏賢於猛獸之渡河或溪水照  
催租之癡顧曰園扉之鞠草即疇密縣之績入冠漢廷  
之班某久矣桂冠楚然望屐連城明月媿先枉於瑰詞  
枯木寒灰已頓回於春意推謝不敏多言未窮

荅吉水顧縣尉啓

開蓬門而掃花徑分知暘谷之暎乘迴風而載雲旂忽  
報梅仙之降恍蒼茫而折屐迎岌嶮之巍冠恭惟仙尉  
學士揆度庚寅收科甲乙瞻虎頭之金粟凜然江右之

祖風詠雞口之月星妙絕漂陽之句法乃如壯縣東南  
一尉之職未補太學朝暮十年之勤即占鵲鵲之祥遂  
集孔鸞之綴某與蝶同夢從鷗爭沙久矣管城之絕交  
塵封破硯遽焉墨客之投贈玉振空山但矜藏去之榮  
莫稱言讐之報

答徐教授啓

伏以晝眠如醉方詒孝先弟子之羣嘲午夢若驚忽辱  
廣文先生之一顧亟整冠而肅容已銜袖而贈言恭惟

教授學士落落千齡之古心混混九州之詞力南州高  
士具存孺子之風流太學諸儒屢荐何蕃之行誼早收  
科於秀孝首分教於膠庠必手抉忠孝仁義之淵釀郁  
斯士俾人皆棟幹琬琰之器光輝有邦夫誰知中沮莠  
蒿之勛端不下凌烟冠劍之傑今焉在泮我自樂無毡  
之寒行矣談經衆爭榮奪席之寵某苓箸漉月襪襖披  
雲已忘魚魯之偏旁敢言識字况復龍鍾而健倒久不  
入城遥睇賓階敬馳謝牘

荅韓安撫啓

字子久

恭審皇咨元臣帥我洪府金印紫綬映三公衮冕之九  
章玉珂青幢分萬乘旌旗之一半湖山春動父老堵觀  
恭惟判府安撫太尉節使相公忠孝雙美而不矜文武  
兩有而無對北斗喉舌可虛聽履之星辰南紀波瀾又  
俟洪源之舟楫繫名德續戎於先正宜台符淵曜於象  
賢潁濱上太尉之書屹然河岳之望永叔記武康之節  
蔚乎彞鼎之勛不崇朝黃麻之一新兼二者青毡而復



舊乃輟槐位火城之邃聿來雨簾雲棟之游山上有山  
小哦樂府之句相門出相即賦遄歸之詩某寒栖滄浪  
遐矚霄漢花迎新使曾未隨扶杖之民葉滿空山首辱  
問東薪之客既對月偕星而折簡復染雲剪水以摘詞  
箴尺牘以為榮白珎非寶操寸管而書紙丹心已灰占  
謝不莊永懷何極

賀周敬伯以辛學恩免省啓

恭審九重尊道萬乘臨雍詔褒東序之名儒各揚乃職

恩視南宮之淡墨咸造在廷允為鄉黨章甫逢掖之縈  
匪直公家瑤林瓊樹之慶恭惟省恩省元學士以凡蔣  
邢茅之胄傳申韓毛鄭之論詩正而葩回狂瀾於既倒  
詞麗以則謝朝花乎已披二十辭家八十鼓篋將軍百  
戰久矣不侯永平三朝於焉賜爵即復吾州戊辰之典  
再魁聖時乙丑之科某如已得之恨身老矣燕雀賀厦  
自憐衰病而未能鸞鳳冲霄更期摩厲而待敵

荅本路陳漕寶謨大卿啓

恭審出節少府觀風上流卿月之度玉墀方騁雲霄之  
步使星之沉銀漢忽臨翊軫之虛父老爭扶杖而往觀  
官吏有解印而自免恭惟都運寶謨大卿海涵地負之  
學星翻漢回之文使之進讀於金華必力陳於仁義使  
之代言於玉署當丕變於訓詞乃讞于張之平式致臯  
蘇之律有德者進惟拜之榮豈無他人可充唐使於十  
道不有君子孰重漢廷之九卿偉進退之甚都曾眷留  
之莫可愛陞內閣之邃俾福大江之西光華一臨威惠

兩有春生南浦回綠波碧草之風光雨卷西山凜秋水  
落霞之霜氣不應黔突之久即歸紫荷之聯某嘗以姓  
名徹於凡格致老牛舐犢之懇昔被龐恩歲渴驥奔泉  
之書今猶永寶屬聞攬轡之始偶苦採薪之憂譚子賀  
齊已幸逃不至之伐李白道甫乃首寄何如之聲感懼  
交加推謝惕若

致仕轉通議大夫除寶文閣待制謝宰執啓  
伏以挂衣冠於神武已叩增秩之一階侍奎壁於寶儲

復進隆名之四等恩華其晚望過厥初伏念某為貧賁  
官未老先病偶憶灋西之茅屋遂別江東之暮雲雙鬢  
蒼浪紛霜華之滿鏡孤身疾痛獨藥裹之關心誤膺天  
上之榮光俾作山中之法從懼濡其尾宜乞其骸蓋禮  
經賜杖之年故應謝事而邦典垂車之令盍致為臣况  
朝廷淬礪於士風欲臣子保全於名節倘乾沒而不已  
斯倒行而何觀四年於茲屢牘以請聖主奚資於敝帚  
眷眷留行賢相未忍於遺簪遲遲報可忽俞音之來下

驚病骨之頓蘇奚出胸詞雖解縱滄江之鷗鷺已抽手  
板猶追隨紫禁之鶯化竊自憂其始終乃蒙護其玷缺  
不辱知己庸非至仁此蓋伏遇某官一德昭天大忠揭  
日謂正臣表治可令廉恥之不張故大夫閔煩式聽山  
林之長往仰承明詔下飾餘生某感恩則多圖報無所  
鐘鳴漏盡雖然縱浪大化之中雨卧風餐豈在一氣鴻  
鈞之外

荅陳勉之丞相啓

恭審皇咨真儒冊拜端揆人主之掄一相蓋美印以久  
虛冢宰之正百工宜秉鈞而獨運告廷風偃挈國山安  
恭惟懽慶某夙依仉牆喜加十陪耿幽潛而遠蹟隔班  
賀之下陳卧痾荅然奏記後矣乃先傳於寶牘外發霄  
霞仍下墮於除書中含雨露慄乎自失感甚而慙再念  
某解組一終還笏五稔仰聖主儲精九重之邃何由記  
憶於病夫微丞相造膝片言之恩其誰薦進乎孤迹雖  
然是舉甚者未安繫上台熙載之維新正天下具瞻之

攸屬伊欲逮格天格帝之烈獨不在持衡之大公倘弗  
避非親非故之嫌庸詎曰清濟之無玷可私墜履之舊  
或承播物之羞寧惟自愛以全軀將恐上累於知己願  
賜密啟函回誤恩俾餘生終逭於鑠金庶末路罔愁於  
碎壁

謝陳丞相啓

伏以退居南畝方尋壑以崎嶇進律西清忽登瀛而榮  
耀允出大鈞之布不令小物之遺伏念某少也信書長



而載贄柴車言邁必遇九紫之羊腸布帆斯張又逢七  
日之鹿角偶以老癘而移病非因高蹇以取名解組一  
星挂冠五稔荅暑於綠岸之雨獨逮於白鷗之沙抱明  
月而長終寧釣天而復夢繫光皇之寶訓新天祿之玉  
函炳若丹青與八卦九章而表裏倬彼雲漢爭三辰五  
緯之光茫曾是耄荒乃叨典領頃辭彭澤號葛天之遺  
民晚伴香山班元和之學士此益伏遇特進大丞相國  
公清忠瑩乎冰雪盛德格乎天淵謨全臯陶之嘉蕪溫

廉而翕受才有周公之美篤故舊而不遺春日載陽勾  
萌盡達某邈未叅拜淒其感懷仰之彌高跂望東關之  
紫氣何以報德持寄山中之白雲

誠齋集卷六十

謹案卷五十五第二頁前四行聊發軔于都內水  
衡之劇務原本衡訛冲据別本改

第五頁前三行微霰零而縮霖雨之手原本霰訛  
露据別本改

卷五十七第二頁前二行遂應號公惇惇之策原  
本惇惇訛惇惇据左傳改

第七頁前四行徼祉福以冥報原本徼訛微今改  
卷五十八第二頁後二行飫以大嚼原本飫訛飲

今改

卷五十九第三頁前一行威行刺舉原本威訛盛  
刺訛判据別本改

第六頁前四行皆我公賜以薦禰之墨原本禰訛  
稱据別本改

卷六十第二頁前七行擣詞何述原本述訛遠据  
別本改


第四頁後二行柴立槁項原本訛作紫主槁頃木

茹空山原本訛采据別本改

第四頁後三行長瓶塵土原本塵訛鹿据別本改

欽定四庫全書





總校官庶吉士臣張能照

校對官庶吉士臣陳墉

謄錄貢生臣張健